



## Early Journal Content on JSTOR, Free to Anyone in the World

This article is one of nearly 500,000 scholarly works digitized and made freely available to everyone in the world by JSTOR.

Known as the Early Journal Content, this set of works include research articles, news, letters, and other writings published in more than 200 of the oldest leading academic journals. The works date from the mid-seventeenth to the early twentieth centuries.

We encourage people to read and share the Early Journal Content openly and to tell others that this resource exists. People may post this content online or redistribute in any way for non-commercial purposes.

Read more about Early Journal Content at <http://about.jstor.org/participate-jstor/individuals/early-journal-content>.

JSTOR is a digital library of academic journals, books, and primary source objects. JSTOR helps people discover, use, and build upon a wide range of content through a powerful research and teaching platform, and preserves this content for future generations. JSTOR is part of ITHAKA, a not-for-profit organization that also includes Ithaka S+R and Portico. For more information about JSTOR, please contact [support@jstor.org](mailto:support@jstor.org).

## II.—LA VIE DE SAINTE CATHERINE D'ALEXANDRIE,

AS CONTAINED IN THE PARIS MANUSCRIPT *La Clayette*.

The literary history of the legend of St. Catherine of Alexandria, although it has already been more or less elaborately studied in various quarters, notably in the *Geschichte der heiligen Katharina von Alexandrien* of the late Hermann Knust (Halle, 1890), still awaits the accurate and thoroughgoing treatment it deserves. My attention was called to the hitherto unpublished version which follows, by the account given of it by M. Paul Meyer, in the *Notices et Extraits des mss. de la Bibliothèque Nationale*, tome 33, 1<sup>re</sup> partie (Paris, 1888), in his study *Sur deux anciens manuscrits français ayant appartenu au marquis de la Clayette (tirage à part, pp. 61–64)*. Several years ago I made a copy of this unique version in the National Library at Paris. Having since been unable to control the widely scattered material essential to a proper discussion of the problems involved in the St. Catherine legend, I have decided to publish, without further delay, the text of the Clayette version, offering it to scholars for further utilization, as a not uninteresting literary and linguistic document.

### LA VIE SAINTE CATHERINE.<sup>1</sup>

Pour l'amitié de Jhesu Crist  
Doivent estre en nostre escrit  
Li service de ses amis.  
Encor ne s'est nus entremis  
5 D'onorer les sainz en ce monde

<sup>1</sup> NOTE.—Insertions by the editor are enclosed in brackets; suppressions are enclosed in marks of parenthesis.

Manuscript Readings.—3 Li] Le

- Qu'an la fin bien ne l'en reponde.  
 Il sont la delitable pleigne  
 Par ou l'en vet en la monteigne.  
 Qui tot le mont a seurmontez  
 10 C'est cil a qui toutes bontez,  
 Toute douceur, toz biens abonde,  
 Qui de noient fist tot le monde.  
 Por l'amitié de ce bon mestre  
 Voill je la vie et la saint' estre  
 15 D'une seue amie retraire  
 Et de latin en romanz traire,  
 Que plus delite a escouter  
 A cels qui l'oent raconter.  
 Un clerc translatee l'avoit,  
 20 Mes, por ce que normant estoit  
 La rime qui fut faite ençois,  
 Si ne pleisoit mie au[s] François.  
 Por ce l'a mes amis tramise  
 Qu'elle sera en François mise,  
 25 Se Dex me donne la puissance,  
 Car en nelui n'ai ge fiance  
 Fors de s'aide seulement.  
 Or li pri au commencement  
 Que son saint Esperit m'envoit  
 30 Que mon sens a bien fere avoit,  
 Et ce que j'ai emprís a feire  
 A mon talent puisse a chief traire.  
 Après requier a la pucelle  
 Qu'elle deprist comme s'encelle  
 35 Qu'il meite em pardurable gloire  
 Ceus qui orront ceste memoire.

Encienement ot a Rome  
 Un emperiere moult preudome  
 Qui ert apelez Constantins,

- 40 Preuz et hardiz et de cuer fins.  
 Filz fu l'empereur Coutant  
 Qui sainte Yglise ama tant  
 C'onques, tant comme il tint la terre,  
 Ne sort a Cretienté guerre.
- 45 Mes il l'estut venir en France  
 Qui lors estoit de sa poissance  
 Por encerchier et demander  
 S'il i avoit que amander,  
 Qu'i l'amendast moult volentiers.
- 50 Mes cil qui les mauvés sentiers  
 Preinent et guerpissent la voie  
 Qui bien les conduit et avoie,  
 Ce sont li chevalier de Rome.  
 L'emperieres iert moult preudome,
- 55 Si amoi[t] Dieu et saint Yglise.  
 L'eneur de l'empire ont asise  
 Seur un Sarrazin mescreant,  
 Por ce qu'il estoit malcreant,  
 Qui haoit Dieu et ses amis.
- 60 Tent iert crueuls et Ent(r)ecris  
 Et tant haoit les Cretiens  
 Qu'il les metoit en ses liens,  
 Si les feisoit en chartre meitre,  
 Puis leur feisoit asez prameitre.
- 65 A sa mesniee et a sa gent  
 Donnoit assez or et argent  
 Por aorer ses diex de fust ;  
 Et se nus hom si hardiz fust  
 Que il osast ce contredire,
- 70 Souffrir li esteut le martire.  
 Por fere les Cretiens prendre  
 S'en est tornez en Alexandre ;  
 Ses mesagiers partout envoie ;  
 Cil se midrent tost a la voie

- 75 Et noncent ce que li rois mande,  
Ce que Marcus li rois commande  
A tretouz cels communement  
Qui sont en son commendement,  
Riches, povres, granz et petiz,  
80 Si com(me) chascuns est aatiz  
A la seue volenté fere,  
Que chascun[s] lest le sien afere  
Et viegne son talent oïr.  
Qui ne li voldra obeïr  
85 Et ara ses diex en despit,  
Mort recevra sanz nul respit.  
Son commendement ont oï  
Cil qui po s'en sont esjoï  
Ce sont cil qui a Dieu entendent  
90 Mes li mauvés qui a ce tendent,  
Qui estoient ami le roi,  
Ont grant joie de leur desroi,  
Et toz cels sont a cort venu  
Grant et petit, jeune et chanu,  
95 Et por amor et por menace.  
Es pleitoires fu grant la place,  
Et li rois s'asist ou mileu.  
Le prevost a guerpi son leu,  
Si est levez a sont estant :  
100 "Or sus," fet il, "venez avant !  
Que je vos ai ci amenez  
De par l'empereür ; venez  
Tretuit au temple por orer.  
La vos convendra ahorer  
105 Nos diex et sacrefice fere  
A chascun selonc son afere.  
Cil qui feront les greigneurs dons  
Aront les gregneurs guerredons.  
Ceste parole oïrent tuit  
110 Parmi la sale ou a grant bruit ;

- A l'un dessiet, a l'autre plest.  
 Li rois se lieve sanz arrest,  
 Tuit se lievent grant et menor ;  
 Et il qui la gregneur honor  
 115 A ses Diex commencer voloit,  
 Tors et moutons comme il souloit  
 A fet ocirre a grant planté.  
 Et cil qui a sa volenté  
 Veullent fere, que qui leur coust,  
 120 De leur despense et de leur coust  
 Ne se sont pas trop esmaïé ;  
 Riche present ont envoié  
 A Ostiex li prince et li conte,  
 Que du petit eüssent honte ;  
 125 Chascun de bien fere s'avence.  
 Li povres, selonc sa poissance,  
 Offrent agniax et oisiax vis.  
 A cels qui l'oent est avis,  
 Que du mu[e]ment des toriaus,  
 130 Des cris des genz et des oisiaus,  
 Q'a force soit la cité prisé,  
 Ou qu'elle soit de feu esprise.  
 En la cité ot qui feisoit  
 Ce que a Diex point ne pleisoit,  
 [188, 1] 135 Avoit une jeune pucelle,  
 Fille de roi et gente et belle  
 Estoit icelle creature,  
 Qu'en li avoit mise nature  
 Tel entencion et tel paine  
 140 Qu' après li poïst feire a paine  
 Autre qui ceste resemblast,  
 Se ceste meïsmes n'emblast  
 La façon et la portraiture  
 Dont feïst autretel figure.  
 145 Et avocques ceste bonté  
 Ot en son qeur une clarté

- Dont ses geurs iert si esbaudiz  
 Qu'i n'estoit clers, tant fust hardiz  
 D'autors ne de dialetique,  
 150 De lays ne de la rectorique,  
 Qui devient lui osast mot dire.  
 Toutes avoit oïes lire  
 Les ars, et toutes les savoit ;  
 Touz les mestres passez avoit  
 155 Qui estoient en la cité  
 De sens et de soutiueté.  
 Tent ot cerchee l'Escriture,  
 Tout mist son qeur et sa nature  
 . . . . .  
 160 Qu'en lui ert un oilz avuglez,  
 Et li Rois du saint Esperiz.  
 Jupin et Tarot et Bariz  
 Ot son qeur guerpi et lessié ;  
 Vers Jhesucrist estoit plessié,  
 165 Qui est commencement et fins.  
 Vers Dieu estoit son qeur si fins  
 Qu'il ne li pleisoit autre chose.  
 Eh Diex ! si glorieuse rose  
 Qui des espines de ce monde  
 170 Estoit issue neite et monde.  
 [188, 2] Si fu fille d'un paien Roi  
 Qui despisoit Dieu et sa loi,  
 Et el l'amoit seur toute rien.  
 Por ce, di ge encore bien,  
 175 Que ceste rose issi d'espine  
 Qui apelee ert Katherine ;  
 Grant avoir orent amassé  
 Mes quant il furent trespasé,  
 Piece avoit, son pere et sa mere,  
 180 Et el n'avoit sereur ne frere,

160 *MS. seems to have un roil'* ; 160, 161 *are apparently corrupt*—168 Et—  
 173 el] elle—173 toutes—180 Et el] elle

- Tout despendoit, selonc l'escrit,  
 Au[s] povres genz por Jhesucrist.  
 Et neporquant son heritage  
 Ne vendi mie, comme sage,  
 185 Einz en maintint la grant mesnie  
 Que son pere li ot lessie ;  
 Moult estoit porveant et preuz.  
 Ice meïsmes iert ses preuz  
 Que el iert monde entre les genz :  
 190 Tout autresi com li argenz,  
 Quant on le velt o le plum meitre,  
 Ne peut empirier ne malmeitre,  
 Mes toz jors fins et neiz il dure ;  
 Tout autresinc est en l'ordure  
 195 Du monde la pucelle neite,  
 N'onques ne vit ne cist ne ceste  
 De lui issir toute sa vie  
 Orgueill ne nule vilenie.  
 Tant l'amoient grant et menor  
 200 Elle portoit a touz honour.  
 La pucelle est toute esbahie  
 De la noise qu'elle a oïe  
 Par l'entree d'une fenestre,  
 Et demande que ce peut estre ;  
 205 Et l'en li dit toute l'enfere.  
 [189, 1] Elle se lieve sanz plus feire  
 Contre lui et de ses serjanz.  
 Courant vet la ou li tiranz  
 Feisoit les ydres aorer,  
 210 Si a ileuc veü plorer  
 Les Cretiens qui, a grant tort,  
 Voloient por peor de mort  
 Guerpir Jhesucrist et sa loi,  
 Et aorer, par leur desroi,  
 215 Les Diex de coivre tresgetez.



- Et celui qui est veritez  
 Avoient por peor lessié.  
 La pucele a le front bessié  
 Comme correciee et dolente,  
 220 De Dieu prier ne fu pas lente  
 En bas, mes en haut vet la voiz,  
 Puis fet le signe de la croiz,  
 Si saut avent hardie et fiere,  
 Si apelle en tel maniere :  
 225 "Empereres," dist la pucele  
 "T'eneur me semont et apelle  
 Et la dignité de ton non.  
 Je te salu, ou voille ou non,  
 Com(me) l'en doit feire Empere[e]ur,  
 230 Se tu le servise et l'oneur  
 Que tu fes ci a ces ymages,  
 Se tu vels fere, comme sages,  
 A celui Roi, a celui mestre,  
 A celui Dieu qui te fist nestre,  
 235 A celui Roi par qui tu regnes,  
 A celui qui depar les regnes,  
 Celui por cui li element  
 Orent premier commencement.  
 Il n'a cure de sens de beste,  
 240 Mes quant il voit le queur honeste,  
 [189, 2] Qui le sert d'euvre et de bouche,  
 Celui aime, si s'en aprouche.  
 C'est l'amor ou il se delite,  
 C'est li vessiax ou il habite.  
 245 L'en ne peut Dieu plus messervir  
 Que lui lessier et ce tenir.  
 N'a de tel servise que fere,  
 Trop est cil de tres mal afere  
 Et cruelment se desnature  
 250 Qui por servir la creature

- Guerpist celui qui tot a fet :  
 Ci a trop dolereus mesfet.  
 Il n'est c'uns Diex, de voir le saches,  
 Se plus en est, ce est outrages.”
- 255     Que que la pucelle parolle  
 Li rois escoute sa parolle  
 Que si bien commenciee avoit,  
 Et de son vis la clarté voit,  
 Onques mes tele n'ot veüe ;
- 260     Son vis, son cors et sa veüe  
 A mise en lui a garder,  
 Mes il n'i sot si bien garder  
 Que de riens que il ot veü  
 Ne l'a espris ne deceü
- 265     Si estoit elle tretant belle.  
 Il li repont, “ Gentis pucelle,  
 Je ne sé mie de ton non,  
 Ne se tu es jeune ou non,  
 Et tu es plus blanche que nois ;
- 270     Ne ton pere je ne quenois  
 N'a quel mestre tu as esté,  
 Mes il pert bien a ta bonté  
 Que tu [n']es [pas] de mal parage,  
 Et ta langue qui tant est sage
- 275     Demontre bien que bons clers furent  
 Cil qui en cure te reçurent.  
 Mes il i ot de tant mespris,  
 Que de fauseté as appris  
 Noz Diex qui sont de grant puissance ;
- 280     Ice tien ge a grant enfance.”  
 La damoisele li respont,  
 Ce qu'il demande li espont :  
 “ Rois, l'en m'apelle Katherine,  
 Fille de roi et de roïne.
- 285     Contentins li rois fu mon pere.

- Se tu demandes, Empereres,  
 Qui furent et con orent non,  
 Il furent de moult grant renon,  
 Tant comme a ce mont apartient ;  
 290 Mes por ce qu'a mon cors ne tient  
 De lui nus riens fors vene gloire,  
 Tiex est de mon non le memoire  
 Des que je reçui la clarté  
 De Jhesucrist, et la bonté,  
 295 M'a tout enluminé le cors  
 Et jeté les frivoles hors  
 Que j'avoie appris en m'enfance,  
 Et la voie de sapience.  
 Lors tornai mon queur a l'escrit  
 300 Parcoi je quenois Jhesucrit  
 J'ai oï parler l'Evangile  
 Qui dit sanz barat et sanz guile,  
 'Ire destruist a la reonde  
 La sapience de ce monde.'  
 305 David redist, nostre bon mestres,  
 Diex est u ciel, la est ses estres,  
 D'ileuc fet sa volenté toute ;  
 Mescreanz est qui de ce doute.  
 Mes li Dieu q'aorent la gent  
 [190, 2] 310 Sont fet au[s] mains d'or et d'argent,  
 Ne sont pas Dieu, ainz sont deable  
 Qui sont en enfer convenable.  
 Que tu aoeres simplement.  
 Rois, tu fes trop ton dempnement.  
 315 Et se tu vels, por ta menace,  
 Que je ore honeur leur face,  
 Tu me monteras leur poissance.  
 Puis que il ont d'ome semblance,  
 Dont covient il que leur oeull voient,  
 320 Leur orilles sentent et oient,

- Et leur bouches doivent parler,  
 Les mains baillier, les piez aler.  
 Se ce n'est voirs, bien peuz savoir  
 Que tuit cil ont po de savoir  
 325 Qui a ces Diex portent honeur,  
 Qu'il ont pooir asez meneur  
 Que n'ont cil qui honeur leur font.  
 Biau sire Diex, tant vos meffont  
 Ceuls qui vos lessent et enneurent  
 330 Cels qui n'oient ne se sequeurent,  
 Qui n'ont poissance ne valor,  
 Ne sentent ne froit ne cholor.  
 Rois, itiex Diex aoeures tu  
 Qui n'ont ne force ne vertu."  
 335 L'Emperere si s'emervelle  
 Et s'esbahist de la merveille  
 Que il ot la pucele dire.  
 "Or nul voill pas fere despire  
 Riens que tu aies aconté,  
 340 Mes je sui bien atalenté  
 De ton sens et de ta loquence;  
 Que se tu fusses des t'anfance  
 De noz buens mestres bien aprise,  
 Tu ne fusses ja entreprise  
 345 De mestre que l'en poïst querre  
 [191,1] N'en ce païs n'en autre terre,  
 Se tant fust que enneur portasses  
 Au[s] diex que tu blames et quasses.  
 Or ne puis mes a toi entendre  
 350 Mes tant me convendra atendre  
 Que ce soit fet que j'ai empris.  
 Après sera li termes pris,  
 Après vendras en mon palés.  
 Se tu vels lors que je te les  
 355 Et te dongne dons honorables,

- Guerpir t'esteut totes tes fables  
 Et crier a nos Diex merci.  
 Otez la moi," fet il, "de ci,  
 Tant la gardez que la demant.
- 360 A grant honeur la vos commant."  
 En garde est prise la pucele.  
 Et l'Emperiere un clerc apele,  
 Unes letres fere commande.  
 Es lestres a que li rois mande
- 365 Au[s] filosofes de sa terre,  
 Au[s] melleurs que l'en poïst querre,  
 Qu'il viegnent tuit en Alixandre,  
 Que d'eus voudra un consoil prendre  
 D'une cause qu'il a a fere ;
- 370 S'il la li peuent a chief traire  
 Tel en sera le guerredon :  
 Qu'a grant honeur et riche don  
 Les en renvoiera arriere.  
 Tiex fu des lestres la maniere.
- 375 Quant furent fetes bien et bel  
 De la pierre de son anel  
 Les fet sagement scëler.  
 Li messagier[s] pensse d'errer,  
 Qu'il ne fu fox ne esbahiz.
- 380 Tan a esté par le païs,  
 [191, 2] Tent a erré et mer et terre,  
 Qu'il a trové ce qu'il va querre.  
 Les sages homes en amaine,  
 Les melleurs clers de tout le regne,
- 385 De toute escience savoient.  
 Devent le roi les amenoient  
 Qui moult bien les a receüz.  
 Quant il les a aperceüz  
 A la cort sont tenu(z) moult chier.
- 390 Li rois les prist a encerchier

- De leur doctrine, a la foiee,  
 Et cil ne l'ont pas desvoiee,  
 Ainz montrent bien par leur parolle  
 Qu'il ont esté a bone escolle.
- 395 Moult li respondent par grant sen.  
 Quant li rois l'ot, merveille(s) s'en.  
 "Li Empereres, que t'en semble?"  
 Issi lui ont dit tuit ensemble.  
 "Por coi nos as a tel besoing
- 400 Ci fet venir, et de si loing,  
 Se tu as grant besogne a fere  
 Bien te saurons de grant afere  
 Conseiller, se tu nos en quiers.
- . . . . .
- 405 Nus ne nos porroit pas confondre,  
 Bien tenrons partout [a] repondre."  
 Li rois repont, qui pas ne tarde,  
 "Je ai une pucele en garde,  
 Bele a le cors, jeune d'aage,
- 410 Mes tant par est parfete et sage  
 Que les bons clers tretouz seurmonte  
 Et les a conclus et fet honte,  
 Que sa prouvance n'atent nus,  
 Que il ne semblent toz confus.
- 415 Bien parolle sens et reison  
 [192, 1] Mes tant y a de mesprison  
 Que toz noz Diex het et atise  
 Et leur commandement refuse,  
 Et encore dit elle pis;
- 420 Porce que j'ai son Dieu despis,  
 Apele toz nos Diex deables;  
 Ici n'est pas ses sens metables,  
 Bien la poïsse a force traire  
 Por sacrefice a noz Diex fere
- 425 Ou li ocirre par torment.

- Mes plus sera fet sagement  
 Se par vos sens avoie fet  
 Qu'el requeneüst son meffet,  
 Et qu'el sacrefiaſt nos Diex  
 430 Qu'el tient por fax et por mortieſ.  
 S'el se mentient en ſa folie  
 Que de noient les contralie  
 Je li feré ſanz refuſer  
 A grant douleur ſa vie user.  
 435 Mes je vos di tot de rechief  
 Que ſ'en pouez traire a un chief,  
 Si que confuſe la rendez,  
 Tel guerredon en atendez :  
 Que riens ne me ſarois requerre  
 440 Que maintenant ne face querre,  
 Ou ſe vos commenciez mon eſtre  
 De mon conſoill ſeroiz tuit meſtre.  
 Li uns repondi par grant ire :  
 "Segneur, [car] oez, noſtre ſire  
 445 Nos a fet en vain travaillier,  
 Matin lever, la nuit veillier,  
 Si eſt toute la ſapience  
 Por un enfent qui par enfance  
 Ne fet fors la gent eſcharnir.  
 450 Or nos a fet li rois garnir  
 [192, 2] De queſtions et de ſoſimes ;  
 Puisque nos ſon meſage oïmes  
 Nos i(l) fumes a grant beſoing,  
 Et ſi ſomes venuz de loing.  
 455 Rois, la pucele que tu diz,  
 Por ce que ne ſoions deſdiz,  
 Nos volons que elle i ſoit.  
 Fei la venir, quelqu'elle ſoit,  
 Por qu'elle ſache, ſanz doutence,  
 460 Qu'el n'oï onques ſapience

- Issir d'ome, s'el ne l'ot hui.  
 Rois, c'iert por toi, non pas por lui ;  
 Bien peüst a lui desconfire  
 Un seul de vos sergenz soufire."  
 465 Ceste ventance et ce desroi  
 A oï un sergent le roi ;  
 A la pucele a tout conté  
 N'a pas son geur espeonté  
 N'avoit point trouble[e] sa pense  
 470 Celle qui a dame Dieu pense.  
 Dieu seulement honeure et prise,  
 Por qui amor elle a emprise  
 Ceste bataille ; riens ne doute,  
 A Dieu s'est commendee toute.  
 475 "Dieu," fet elle, "verai savoir,  
 Verai vertu, verai avoir,  
 Vraie vertu qui toz soutiens,  
 Qui toz gardes, qui toz maintiens,  
 Qui tot formas, qui tot feïs,  
 480 Qui a tes chiers amis deïs  
 Quant devient les princes vendroient  
 Ne pensassent que il diroient ;  
 Tu leur donnoies habundance  
 De parolle, de sapience,  
 485 Por leur aversaire confondre,  
 [193, 1] Qu'il ne savoient que repondre ;  
 Tu qui espons qu'est bien a fere,  
 Done moi sens a ceste afere.  
 Donne moi douceur et parolle  
 490 Que il ne me tiegnent a folle ;  
 Cil qui vuellent quasser ton non  
 Veincuz les fes, vueulent ou non,  
 Et confus de leur mescreance  
 Ou il aient reconnoissance  
 495 Par le tesmoing de ton escrit



Que tu aies non Jhesucrist.  
 Diex toz poissanz, verais et vis,  
 Einssi soit il comme devis.”

A peines ot s'oroison feite

500 Quant Dex qui les dehez reheté  
 Et toz les desvoiez ravoie  
 Un ange du ciel li envoie  
 Qui la conforte et dit, “Amie,  
 Ta parolle, n'en doute mie,

505 A Dieu oïe et entendue,  
 Cil a qui tu es atendue  
 Donra toi a ta volenté  
 Douce parolle a grant plenté  
 Parcoi vaincras tes anemis.

510 Quant les aras au desoz mis  
 Il leront leur iniquité  
 Et connoistront la verité,  
 Puis souferront por Dieu la peine,  
 Lassus el pardurable regne

515 Seront por t'amor alevé;  
 Et se tu as Jhesu loé,  
 Encore l'aime et loe et prise,  
 Par tens seras du monde prise,  
 Si [te] tendras el Ciel la sus.

520 Qant seras venue au desus  
 [193, 2] De touz tes anemis mortieux,  
 Espous aras, ainz ne fu tiex,  
 A qui tu t'ies toz jors donnee;  
 Reïne seras coronee,

525 Que cil est Rois qui te velt prandre;  
 A tel segneur doit l'en entendre,  
 Gardes por autres ne le changes.  
 Je sui Michiel, prince des anges  
 Que Diex ton bon espous t'envoie

530 Por toi conduire a droite voie.”

- A tent li anges s'en despart :  
 La pucelle, de l'autre part,  
 Qui a eü le bon confort,  
 Vers Dieu a torné son acort,  
 535 De tenir son proposement  
 Ileuc atent son jugement.  
 A l'endemain, ce dist l'estoire,  
 Se sist li rois en son pretoire,  
 Delez lui les cinquante sages.  
 540 A la dame vint un mesages  
 De par le roi qui li a dit  
 Qu'el viegne a lui, sanz contredit.  
 La pucele est venue a cort,  
 Tretouz li peuples i acort  
 545 Por oïr la desputoison.  
 Li rois leur demande reison  
 Porqoi ne commence l'asaut.  
 La pucele en estant saut  
 Si a parlé hardiement :  
 550 " Rois, tu as fet commandement  
 Que ces cinquante sages soient  
 Encontre moi, et si m'essaient.  
 Tu les as toz a ta partie,  
 Si n'est pas bien l'œuvre partie,  
 Bien t'i garde, a ceste bataille ;  
 [194, 1] 555 Je sui jeune fame, sanz faille,  
 Et sanz aïde et sanz deffensse ;  
 Se Jesucrist de moi ne pensse  
 Ne porroi pas vers euls durer ;  
 Mes ce me fet aseürer,  
 560 Que sa deffensse m'a permise  
 Diex en qui j'ai m'entente mise ;  
 Mes de ce me doit ennuier  
 Que tu leur as pramis loier  
 S'il me pevent au desouz meitre ;

- 565 Et tu me doiz un don prameitre.  
 Or ce revoill dire et conter,  
 Que se je les puis seurmonter  
 Par bon tesmoing de saint escrit,  
 Que tu creras en Jhesucrist ;
- 570 C'est ma pramesse, c'est mes dons,  
 Itex sera mes guerredons.  
 Li rois repont, tot maintenant :  
 " Bel' amie, tel convenent  
 Ne me peuz tu, ne ne doiz, fere :
- 575 Je ne sui pas de ton afere,  
 Mes ja verrons bien au parler  
 Se tes Diex te porras garder."  
 La pucelle plus ne sejourne,  
 Vers ses anemis se retorne
- 580 Porce q'an sa cause se fie ;  
 En tel maniere les defie :  
 " Segneur, ceenz sont tuit venu,  
 Petit, jeune, grant et chanu,  
 Por noz parolles escouter.
- 585 Or ne doit nus de vous douter ;  
 S'il a riens em penssé de dire,  
 Tens est d'entrer en la matire ;  
 Por toz parolt le mielz parlent  
 Et tretot die son talent."
- [194, 2] 590 Li uns repont, qui fu ainnez  
 Et mielz vaillant, et mielz senez :  
 " Belle amie, einssi n'est il pas ;  
 Por toi avons marchié meint pas  
 Et por toi somes assemblé ;
- 595 Je nel dirai pas en emblé,  
 Tout en apert parler voudrai :  
 Commenciez, et je repondrai."  
 La virge ne s'est pas teüe,  
 Ainz dist tote desporveüe :

- 600 " Puis que de votre foloience  
 Otaï mon qeur et ma leance,  
 Et je connu la fausseté  
 Ou j'avoie lonc tens esté,  
 Et j'oi en Dieu (tout) mon penser mis,  
 605 En Dieu qui est li miens amis,  
 Et je oi receü la foi  
 De Jhesucrist en qui je croi,  
 Desi ce jor me fu amer  
 Et entre totes et amer ;  
 610 Des lors en haï ge(s) leur livres  
 Dont mes cuers ot esté si yvres  
 Qu'il ne pooit estre repris.  
 Si volentiers avoie apris  
 Que j'avoie mis au desouz  
 615 Les clers de ceste terre touz.  
 Touz mes mestres passé avoie  
 Par les livres que je savoie,  
 Mes por ce que je sé de voir  
 Que la nul jor por nul savoir  
 620 N'auroie pardurable vie,  
 [195, 1] Einssi com(me) j'oi primes envie  
 De l'aprendre et du retenir,  
 Issi ne me po ge tenir  
 Que tot ne meïsse en obli  
 625 Qu'en mon qeur avoie establi,  
 Que ce n'estoit se fable non.  
 En Dieu, que Jhesucrist a non,  
 Tornai mon qeur et m'esperance,  
 Si n'i sai autre sapience  
 630 Fors celui Dieu qui degna nestre  
 Home por home, et por lui estre,  
 De virge sanz corruption.  
 Souffri et mort et passion  
 San ce que mestier n'en avoit,

- 635 Mes de fine verté savoit,  
 Se li mors de la fause pome  
 Parcoi deable deçut home  
 Ne fust par mort d'ome reçuz  
 Hom fust aussi comme veüz ;  
 640 Por ce il prist notre nature  
 En semblance de creature.  
 Bien parut a s'umilité  
 Qu'il estoit Diex, par verité  
 Il estoit Diex et hom ensemble.  
 645 Issi est il, issi me semble,  
 C'est cil en qui mon qeur se fie,  
 C'est la moie filosofie.  
 En son non et en son memoire,  
 C'est ma joie, c'est ma vitoire,  
 650 Qui veincra toz mes anemis,  
 Car einssi le m'a il pramis."  
 A poine avoit elle ce dit  
 Quant li uns d'eus dit ce mesdit  
 Et cria comme forsenez :  
 655 "Sire," fet il ; "qui maintenez  
 [195, 2] L'oneur et l'empire de Rome,  
 Qui estes sage(s) et vaillant home,  
 Quant faudra iceste folor,  
 Ce grant barat, ceste dolor,  
 660 Dont cist Crestien desleal  
 Sont si du tot torné a mal  
 Qu'il ont noz Diex si en despit?  
 Oez com(me) ceste les despit ;  
 Nos cuidions a la parclose  
 665 Oïr de lui aucune chose  
 Dont nos fusions esbaudi.  
 Nos somes voirement traï,  
 Qu'el mont n'a plus de sages homes ;  
 Bien voi qu'en vain nos travellomes

- 670 Por iceste meschine fole  
 Qui a commencié sa parolle  
 Por ce Jhesu que il tant aiment.  
 Ce est leur Dieu qui, ce tesmoignent,  
 De son deciple fu venduz
- 675 Et par les mains en croiz penduz,  
 Mes ne pot eschaper de mort  
 Cil qu'i[1] essaument a tel tort.  
 Au tierz jor après s'assemblerent  
 Si deciple, si l'emporterent.
- 680 Puis noncierent por les citez  
 Qu'il ert de mort resucitez,  
 Et por acroire leur faintise  
 Dient qu'il a sa manentise  
 U ciel amont ou il monta
- 685 Quant il de mort resucita.”  
 La pucelle repont briément :  
 “J'ai fait a droit commencement  
 De celui Dieu dont pas ne dout,  
 Qui est commencement de tout.
- [196, 1] 690 Il est droit Rois et Empereres  
 Par qui Diex li souverains peres,  
 En qui tote(s) bontez habunde,  
 A fait de noient tot le monde.  
 Et qu'i t'iroie je fablant ?
- 695 Je te dirai tot mon semblant :  
 De lui, par lui, en lui peuz querre  
 Quanque tu peuz veoir en terre,  
 Le sens et la vive fontaine  
 Dont toz biens sort par large veine.”
- 700 Lors repont li rectoriens :  
 “Se cil qui croient Cretiens  
 Fust li filz Dieu ou vrai Diex,  
 Comment pot il estre mortieux ?  
 Comment poïst mort deconfire

- 705 Celui qui de la mort est sire?  
 Et s'il fust hom, ne poïst mie  
 De mort resuciter en vie.  
 La demoiselle li respont :  
 "Frere, tu as lessié le pont  
 710 Por passer parmi le perill ;  
 Se croiz le pere sanz le fill  
 Tu as mespris trop leïement.  
 Tu m'as dit au commencement  
 Que s'il fust hom, ne poïst nestre,  
 715 Et s'il fust Diex, hom ne pot estre,  
 Et s'il fust Dex, mort nel veinquist,  
 Et s'il fust hom, ne revesquist.  
 Dont ne croiz tu qu'eust poesté  
 Diex de fere sa volenté?  
 720 Et se tu croiz qu'il le peut fere  
 Porcoi ne croiz tu cest afere,  
 Que cil qui toutes choses fist  
 Preïst mort d'ome, s'il volsist ;  
 Et cil qui senne les enfers  
 725 Et fet les clos et droiz et fers,  
 Et cil qui ne pevent veoir  
 Enlumine par son pooir,  
 Seur lui segnorie n'eüst  
 Et soi resuciter peüst ?  
 730 Ce doiz tu croire finement.  
 Et cil qui sofri le torment  
 Est hom verais, sanz fausseté.  
 La mort ocist l'humanité,  
 El n'ocist mie Jhesucrist,  
 735 Mes Jhesucrist la mort ocist.  
 Gardes que deceüz ne soies,  
 Droiz est que tu meïmes voies  
 De la notre sainte esriture.  
 Mes se je di par aventure,

- 740 N'en croire pas la verité  
 Se je le te di par verté.  
 Por ce te donrai sanz delai  
 Le tesmoing de la teue loi ;  
 Espoir me sauras mielz repondre.
- 745 L'en ne peut home mielz confondre  
 Que ferir de son dart meïmes.  
 De ton Platon te dirai primes  
 Qui dist que Dex se monterroit  
 A cels qui montrez ne s'estoit.
- 750 Et qu'aroit quatre reonz signes,  
 C'est la vraie croiz, qui fu dignes  
 De soutenir le digne mestre  
 Qui tot le mont a a sa destre.  
 " Sebile parla, a son tens,
- 755 Que Jhesucrist nestroit, li buens,  
 Qui seroit nez d'une pucele ;  
 Et si redist autre nouvelle,  
 Et si dist que beneoist fust  
 Cil qui seroit penduz en fust ;
- [197, 1] 760 Por ce beneüré le dist,  
 Qu'il revivroit, si comme il fist.  
 Tel sont li tesmoing de Sebile.  
 Ja te deïsse de Virgile,  
 Mes bien t'en peuz a itant fere.
- 765 Se tu n'em peuz ton qeur atrere,  
 Dont est il droiz q'arrieres aies  
 Le deable q'avoir soloies."  
 A tant est la virge teüe.  
 La parolle a cil esmeüe,
- 770 Et dist : " Pucele, or me respon ;  
 Ce que demanderai m'espon :  
 Se Jhesu, qui ta bouche nome,  
 Estoit Diex en semblence d'ome  
 Et fist tant miracles en terre,



- 775 Comment l'osa la mort requerre ?  
 Se par lui resordent li mort,  
 Comment souffri perill de mort  
 Cil qui n'a mestier de morir  
 Et peut la gent de mort guerir ?
- 780 Elle repont, cil s'est teüz  
 (Cil ne peut estre deceüz) :  
 "Que tu cuides que Diex soit mort,  
 Quant tu ce croiz, tu as grant tort ;  
 Ainz ne morut ne ne morra,
- 785 Que toz jors fu [il] et sera.  
 Mes ce ne tieng mie a eschar  
 Que l'enfermeté de la char.  
 Qui poïst home souffrir mort  
 Fors Dieu, qui sucité home mort ?
- 790 Hom qui avoit le pechié fet  
 Souffri la mort por son forfet ;  
 Des qu'il avoit pechié, en fust  
 Droiz est que tormentez il fust.  
 La char morut naturellement,
- [197, 2] 795 Diex fust tot quites du torment,  
 Ce sachiez, si le vusist fere ;  
 Que bien poïst homme soutraire  
 Par un seul engin de deable ;  
 Mes sa joutise est reisonable,
- 800 Que sanz reison il ne fist rien.  
 Ceste chose establit il bien,  
 Que il volt que celui vainquist  
 Qui home vainqui et conquist.  
 Et por ce prist seur lui le fes,
- 805 Que plus fust humbles et confës  
 Hom vers lui qui sauvé l'avoit ;  
 Issi fu comme estre devoit."  
 Par tiex diz et par tiex prouvences  
 Leur a faillies leur doutances,

- 810 Si qu'il ne sevent mes que dire  
 Ne ne li peuent contredire.  
 A ces diz n'ont riens respondu,  
 Tuit sont maté et confondu  
 Si com Diex l'avoit devisé.
- 815 Puis a li uns l'autre avisé ;  
 Si ont perdu leur sens tretot  
 Que honiz sont du tot en tot.  
 Quant l'Emperieres a veü  
 Que il se sont tretuit teü,
- 820 Et qu'il sont tretuit esbahi,  
 Par mautalent a dit : "Ahi !  
 Com je voi ci grant mauvestié.  
 Moult estiés ore heitié  
 Et apresez de desputer ;
- 825 Moult vos voi ore toz douter,  
 Que perdu avez la parolle  
 Por une meschinette folle."  
 Li plus sages d'euls toz se lieve,  
 De ce que il forment le grieve,
- [198, 1] 830 Si li respont irieement :  
 "Rois, ce sachiez veraïement,  
 Que avions tesmoinz assez ;  
 De science avions passez  
 Tretoz les clers qui soient né ;
- 835 Onques mes ne fumes mené  
 A ce que nus fust tant osez  
 C'onques par nous fust oposez  
 Li uns de nos, por voir le saches ;  
 Et s'en lui fust si grant outrages
- 840 Que contre nos osast parler,  
 (Tout) confus le convenroit aler.  
 Autre chose est de la meichine  
 Qui de sapience devine,

- Que repondre ne li savons ;  
 845 Si grant peor de li avons  
 Nos n'osons dire une parolle  
 Por iceste pucelle fole.  
 Si te disons tretuit ensemble  
 Que ver(i)tez est, et bien nos semble  
 850 Ce que la damoiselle dit ;  
 Ja n'i metromes contredit,  
 Einz recevromes sa creance  
 Se nos n'avons melleur(s) prouvence  
 Et bon tesmoing de l'escriture.  
 855 Diex ! Diex ! ou as mise ta cure ?  
 Se ne montre leal escrit  
 Nos croiromes en Jhesucrit,  
 Qui eschive les mauves vices  
 Et done toz les benefices ;  
 860 Il est poissanz des bien[s] donner  
 Et moult set bien guerredonner  
 Tout le travaill et tot l'ennui  
 Que si sergent souffrent por lui."  
 Quant li tiranz a entendu  
 [198, 2] 865 Qu'a Jhesucrist se sont rendu,  
 Et qu'il ont guerpie leur loy,  
 Enmi la cité sanz delai  
 A commendé que l'en li face  
 Un feu arden en mi la place ;  
 870 Si commande li anemis  
 Que tuit li sage i soient mis,  
 Les mains liees et les piez ;  
 Issi soient par leur pechiez.  
 A tent s'en torna uns messages  
 875 Et uns des clers qui estoit sages  
 Se fu levez en son estant ;  
 Touz les autres vet confortant,

Et dist : " Segneur, paor n'aiez

. . . . .

880 Les deables, la Dieu merci,  
Que servi avons jusques ci.  
Veez Jhesucrist qui nos apele ;  
Alons tuit prier la pucele,  
Ançois qu'an nos ait enserré,

885 Que nos soions regeneré  
Par baptesme si com est droiz,  
Car autrement pas ne vaudroit  
A la celestial coronne  
Que dame Diex a martirs done.

890 Tretuit le sivent, ce me semble ;  
A la pucelle vont ensemble,  
Si li prient tot em plorant  
Qu'el ne vaut mie demorant,  
Recevoir leur face baptesme

895 Et la sainte oncion du cresse.  
" Segneur," ce dit la Dieu amie,  
" Por Dieu, ne vos esmaiez mie,  
Mes hardiz chevaliers soiez.  
Dame Diex vos a essaiez

900 Par moi que vos ici veez.  
A son talent vos a trovez ;  
[199, 1] Vos estes ore et bon et fin,  
Mes meilleur seroiz en la fin ;  
De baptesme n'aiez peor,

905 Que li douz sans du sauveor  
Qu'il expandi por nos pechiez  
Dont touz li monz est entechiez,  
Vos ert baptesme de saluz,  
Et moult vos avra hui valuz

910 La bone foi et la creance ;  
De ce n'aiez nule doutance,  
Que li feus ou vous enterrez

- Et li tormenz que souferrez  
 Vos tendra toz sains et heitiez.
- 915 Ne plorez pas, soiez toz liez,  
 Ne doutez pas cels qui le cors  
 Peuent ocirre par dehors ;  
 Celui creez qui cors et ame  
 Peut ocirre d'infernal flame."
- 920 A tant sont li serjant venu,  
 Et li cinquante tretuit nu,  
 Les mains liees et les piez,  
 Les out enmi le feu sachiez.  
 Cil crioient a haute voiz,
- 925 Jhesu reclaiment et sa croiz,  
 Illeuc ont le torment souffert  
 Par coi il ont a Dieu ofert  
 Le sacrifice de leur cors.  
 U ciel ou est li grant tresors,
- 930 La grant richeice, la grant joie,  
 Li droiz chemin, la droite voie,  
 S'en sont a dame Dieu monté  
 [199, 2] Qui les reçut par sa bonté  
 Et les mist en son paradis.
- 935 Mort souffrirent, ce m'est avis,  
 Si com(me) la leitre le remembre,  
 Le treziesme jor de novembre.  
 De ce avint une merveille  
 A qui nullè ne s'aparelle,
- 940 Onques ne leur malmist li feus  
 Ne leur robes ne leur cheveus,  
 N'onques leur char plus ne broï.  
 Aussi com fussent endormi  
 Se gisoient en mi la place,
- 945 Et si avoit chascuns la face  
 Aussi vermelle comme rose.  
 Por la merveille de la chose

- A Dame Dieu se convertirent  
 Plusieurs Sarrazins qui ce virent.  
 950 Li Cretien ont les cors pris  
 De nuit, qu'il ne fussent malmis,  
 Et si les ont enseveliz ;  
 En cele oeuvre ert toz leur deliz.  
 L'Emperere vit la meschine  
 955 Vers dame Dieu plus enterine  
 Qu'elle n'avoit devant esté,  
 Et li feus que voit apresté  
 Ne la peut pas espeonter.  
 Or la velt de rechief tenter,  
 960 Ou por laidir ou por malmeitre,  
 Por savoir si la porroit meitre  
 A ce qu'el volsist aorer  
 Ses ymages, por honorer.  
 Vers lui se torne, si l'apelle :  
 965 " Haï ! haï, gentis pucelle,  
 Car pran consoill a toi meïmes.  
 Des l'eure que je te vi primes  
 [200, 1] Oi je pitié de ta jovente ;  
 Toz jors i ai mise m'entente  
 970 A delivrer ton cors de peine.  
 Jentis pucelle, car t'en peine,  
 Croi en noz Diex, sel sacrefie ;  
 Il est moult fox qui ne s'i fie.  
 Se tu fes ce que t'ai prié,  
 975 Quant tu aras sacrefié,  
 Tretout aussi te tendrai chiere,  
 Autel semblant et autel chiere  
 Te feré com a la reïne.  
 Tote sera vers toi encline  
 980 Ma gent ; ma terre, ma mesnie,  
 Toute sera par toi partie."

- La pucele a un ris jeté,  
 Si respondi la verité:  
 "Empereres, les ce ester,  
 985 Ne me doiz pas amonester  
 A fere si grant felonie.  
 Jhesucrist, qui je sui amie,  
 M'a por voir a espouse prise;  
 C'est cil qui mes cuers aime et prise,  
 990 C'est mes deliz, ce est ma joie,  
 N'est riens nule dont j'aie joie  
 Fors seulement de s'amitié.  
 Por li ai ge de moi pitié,  
 Por li gart ge mon pucelage.  
 995 Je ne te crieng por nul damage  
 Que tu puisses a mon cors fere.  
 Torment ne me porroient trere  
 De Dieu servir, de Dieu amer,  
 [200, 2] De lui prier et reclamer."  
 1000 Li tiranz est tot forsenez,  
 Ses menitres a apelez  
 Et commendé q'an la despoille;  
 Toute nue, voille ou ne voille,  
 Que l'en la bate d'esglentiers;  
 1005 Et cil le font moult volentiers.  
 Toute li tranchent la char tendre,  
 Qu'el ne fu pas digne d'atendre  
 Le petit cop d'une vergeite.  
 Puis a commandé q'an la meite  
 1010 En une chartre sanz clarté  
 Ou avoit sovent grant nerté,  
 Que il n'i ait nule lumiere;  
 Einssi soit leenz en teniebre,  
 Ne n'en isse de douze jors;  
 1015 Itiex i soit mes ses seors.

- Li sergent ont la virge prise,  
 En obscure prison l'ont mise.  
 Illeuc lessent la Dieu amie,  
 Mes Diex ne l'oblia lors mie.
- 1020 Son ange en la chartre envoie  
 Por ce qu'il velt qu'elle le voie ;  
 Jhesu envoia de sa gloire  
 Por lui tenir en son memoire,  
 Et la clarté esperital
- 1025 Mist Diex dedenz la chartre aval  
 Por l'ange qui la reconforte,  
 Et si grant clarté li aporte,  
 Toute la chartre en enlumine.  
 Cil qui gardoient la meschine
- [201,1] 1030 Ont tuit si grant peor eü  
 De la clarté qu'il ont veü,  
 Qu'il ne peuent un mot sonner,  
 N'il ne sevent quel part aler.
- A tant par aventure avint
- 1035 Que l'Emperere aler convint  
 Hors du país por une afere  
 Qui li estut a force fere.  
 Entre ces choses la Roïne  
 Oï parler de la meschine,
- 1040 Comment li rois l'avoit traïe,  
 Comme elle iert sage et afeitie,  
 Que elle avoit vaincuz les sages,  
 Comme li rois par ses mesages  
 L'avoit fete d'esglentiers batre,
- 1045 Et comment il la fist embatre  
 En la chartre qui est obscure,  
 Et comme li rois n'avoit cure  
 Qu'elle mengast ne ne beüst,  
 Qu'elle par fain mort receüst.

1025 Dieu—1033 seveni] peuent—1037 Emperes—1044 Comme lavoit  
 fet—1048 beüst] seust



- 1050 Quant ot oï la cruel paine,  
 Ja soit ce qu'elle fust peaine,  
 Moult est engoisseeuse et hative  
 De veoir la, tant comme est vive,  
 Mes moult se doute en son corage
- 1055 Que l'Emperere ne le sache.  
 Que qu'el aloit en tel maniere  
 Par la sale avant et arriere,  
 Pensant et repenssant encontre,  
 Un prince li vint a l'encontre
- 1060 Qui Porphires avoit a non,  
 Qui estoit de moult grant renon  
 Et bien savoit, sanz nul mesdit,  
 Celer ce q'an li avoit dit.  
 L'Empereriz l'a apelé :
- [201, 2] 1065 "Or soit," fet elle, "bien celé,  
 Biaux amis, ce que t'en voil dire.  
 A la pucele que mes sire  
 Tient en sa chartre parleroie  
 Moult volentiers, se je pooie.
- 1070 Or vos en convient entremeitre,  
 Ou par doner ou par prameitre,  
 Que ne vos encusent les guetes.  
 Se vos m'amez, issi le feïtes,  
 Por Dieu, amis, ne vos ennuit.
- 1075 Oez ce que je vi ennuit :  
 En mon dormant m'estoit avis  
 De la virge que je devis,  
 Qu'elle ert en une chambre assise,  
 De grant clarté partot esprise,
- 1080 Et entor lui furent assis  
 Homes blans, ne sai sept ou six,  
 Je ne m'i soi pas bien garder  
 . . . . .  
 El m'apela et dist après

- 1085 Que j'alasse de lui plus pres.  
 U chief a un des homes blans  
 A ses mains mises par devant,  
 Une corone d'or li prist,  
 U chief la corone me mist.
- 1090 Après me dist, 'Gentis roïne,  
 Ne doiz avoir nule haïne  
 Vers le Segneur qui tel corone  
 Par moi te presente et [te] done;  
 C'est Jhesucrist, notre bon pere,
- 1095 Devant qui nus n'est Emperere.'  
 Por ceste avision, biau sire,  
 Seufre mes cuers issi grant ire  
 Que je ne puis durer par nuit.  
 Comment cuidiez vos qui m'ennuit?
- [202, 1] 1100 Je ne puis boivre ne mengier;  
 Je ne souferrai plus dengier,  
 Ne ce penssé dont je me deull:  
 La damoiselle veoir vuoill."  
 A tant li respondi Porfire:
- 1105 "Dame, voirs est que notre Sire  
 Est moult cruels a itel gent;  
 Por ce ne seroit il pas gent,  
 Que nos faillisse a cest afere.  
 Commendez, je sui prest de fere
- 1110 Tretot votre commendement.  
 Or ne vous faut que seulement  
 Tant que vos peüssiez porvoir  
 Le consoill des guetes avoir."  
 A tent s'en est tornez au[s] guetes,
- 1115 Par pramesse les a atraites  
 Si qu'il li ont acreanté  
 Que il feront sa volenté.  
 Quant il furent el premier some

- La roïne prant le preudome,  
 1120 Si sont alez en la prison.  
 Si comme el vit en avison,  
 La roïne a clarté veüe.  
 De la peor qu'il ot eüe  
 Orent endui que il chaïrent,  
 1125 Tant durement s'en esbahirent ;  
 Mes un ordre s'est expandue  
 Qui la clarté leur a rendue  
 Et toz asoagiez les a.  
 Maintenant que les adesa,  
 1130 " Levez sus," ce dist la pucele,  
 " Veez Jhesucrist qui vos apele  
 Por demorer avocques lui.  
 A tent se sont levez endui  
 Si ont la virge regardee  
 1135 . . . . .  
 D'anges qui avoc lui estoient  
 [202, 2] Qui ses plaies li afeitoient  
 Et onguoient d'un onguement  
 Par qoi la char si doucement  
 1140 Estoit tornee a tel clarté,  
 Onques n'avoit si clere esté ;  
 Et si revirent les veillarz  
 Les lui seoir de toutes parz,  
 Qui avoient si cler les vis  
 1145 Que ne peuent par nul devis  
 Leur clarté estre devisé,  
 Qu'il ne peuent estre avisé  
 Du prince ne de la reïne.  
 Puis a assise la meschine  
 1150 U chief a l'ome une corone ;  
 El chief l'Empereriz la donne,  
 Et dit : " Seigneur, vez ci la dame,  
 La saintisme de cors et d'ame ;

- Si deprions notre Segneur  
 1155 Q'autresi grant part ou gregneur  
 Aiez en son regne con gié;  
 Et il m'a doné le congié.  
 Et de ce prince qui est ci  
 Aura notre Sire merci,  
 1160 Que li dons li en est donnez  
 Q'après martire(s) ert coronez."  
 Après, li ont li veillart dit :  
 "Kateline, sanz contredit  
 A Dieu oïe ta priere  
 1165 Lequel amor tu as si chiere  
 Que por lui es ci enchartree  
 Et en tenebres es entree.  
 Por la clarté du ciel avoir  
 Or te disomes nos por voir  
 1170 Que Diex t'a octroïé le don  
 Que ceus aront vrai pardon  
 [203, 1] Por qui tu degneras prier.  
 Ne se doivent pas esmoier  
 Cil qui por toi sont venu ci,  
 1175 Que Dex ara d'eus tel merci  
 Qu' au monde vaincront le deable  
 Et aront vie pardurable."  
 Issi ont parlé li veillart ;  
 La pucele, de l'autre part,  
 1180 S'a si confortee la Dame :  
 "N'aiez tu mie peur de fame,  
 Mes bon et enterin et fors,  
 Et Diex t'envoiera confort.  
 Jusqu' au tierz jor iras o lui ;  
 1185 Travaill ne peine ne anui  
 De leur angoisse ne menace,  
 Ne doiz douter que l'en te face ;  
 Que les engoisses de ce monde  
 Sont fin neant a la reonde,

- 1190 Après la joie et la leesce  
 Que cil aront pour leur destreice ;  
 De leur martire et de leur poine  
 Gaagneront Dieu et son regne.”  
 A tant a repondu Porfire,
- 1195 Et dit : “ Pucele, li tiens Sire,  
 Di moi, quel guerredon peut rendre  
 A cels qui voldroient despendre  
 Por s’amor la temporel vie ?  
 Que de l’oïr ai grant envie.”
- 1200 “ Porfire,” ce dist Katerine,  
 “ Se tu as bone et enterine  
 La volenté de l’escouter,  
 Bien me porras oïr conter ;  
 Que cil siecles n’est c’uns trepas,
- 1205 Bien sai, et si n’en douter pas,  
 Et aussi vit l’en an ce monde  
 [203, 2] Come en une chartre parfonde  
 Ou il n’a se teneibres non.  
 Ja ne iert de si grant renon
- 1210 Nus hom, ne de si grant savoir,  
 Qu’il ne muire, par estovoir :  
 Issi est de chose mondeine.  
 Doleur, engoisie, mal et paine  
 Covoitise, barat, envie,
- 1215 Sont les deliz de ceste vie.  
 Ce païs clame je tot quite,  
 Mes li païs ou Dex habite  
 Est biax et nez, sanz nul ordure ;  
 Toz jors il vit, toz jors il dure,
- 1220 Que il peut fere son estage.  
 Ce païs n’est pas heritage  
 Cil qui le mont vellent despire ;  
 La n’envellist nus, ne n’empire,  
 La n’estaint ne char ne couleur

- 1225 Enfermetez, mal ne douleur ;  
 La est, sanz ordure, biautez,  
 Sanz trecherie, leautez,  
 Joie sanz ire, jor[s] sanz nuit  
 Ileuc n'a riens qui li ennuit ;
- 1230 Ileuc ne crient aversité  
 Li estagiers de la cité.  
 N'en diré mal, que je ne puis,  
 Mes bien assez, que je il truis  
 Qui seroit sanz fons et sans rive.
- 1235 Ne porroie por riens que vive  
 Ce que tu verras aconter,  
 Se peuz en la cité monter.  
 Se tu gardes ta leauté  
 Jusq'a la fin sanz fauseté,
- 1240 Bien i iras, ce te pramet.  
 Mes de bien fere t'entremet."  
 [204, 1] Issi parolle la meichine.  
 Le chevalier et la reïne  
 S'em partirent tot maintenant.
- 1245 Grant joie vont endui feisant  
 Des homes blans qu'il ont veü  
 Et des conforz qu'il ont eü  
 De la glorieuse pucele.  
 Li chevalier ont fet querele
- 1250 Et demandent par leur deduit  
 Ou Porfire toute la nuit  
 Ot avec la reïne esté.  
 Porfire n'a point redouté,  
 Il leur a dit, sanz plus atendre,
- 1255 "Segneurs, se voliez entendre  
 A ce que diré orendroit,  
 Sachiez que bien nos en vendroit.  
 Ne demandez ou j'ai esté  
 Mes fetes a ma volenté
- 1260 Et gaagniez la votre joie

- Soit pardurable avoc la moie.  
 Sachiez que cil n'est mie sages  
 Qui fet honeur a ces ymages  
 Que avez servi jusques ci.  
 1265 Criez a dame Dieu merci  
 Qui fist tretoutes creatures,  
 Et despisiez itiex feitures  
 Qui ne si peuvent conseillier.  
 Nus ne se peut plus avillier  
 1270 Que servir mains vaillent que l[u]i.  
 Servez et honorez celui  
 Qui est Sires de tout le monde,  
 Qui tot peut fere a la reonde."  
 Deux cent en i avoit par conte  
 1275 Des chevaliers qui, par le conte,  
 Ont les ymages en despit  
 Et sont tornez a Jhesucrit.  
 La damoiselle endementiers  
 Par quinze jors tretouz entiers  
 1280 En l'oscure chartre s'estut,  
 Ou ainz ne menja ne ne but  
 Par home qui en terre vive,  
 Et si est elle encore vive,  
 Car Diex la cui protecions  
 1285 Reput en la fosse au[s] larrons  
 Dam Daniel, le bon profeite,  
 A ceste peüe et refete  
 Par un coulou blanc comme cine ;  
 De tel mesage est elle digne.  
 1290 Quant acompli furent li jor  
 De la demeure et du sejour  
 Qu'ele dut en la chartre fere,  
 Diex Jhesucrist, li debonaire,  
 Qui a sa gent n'est mie estranges,  
 1295 O une compaignie d'anges  
 Est descenduz en la prison

- Por conforter le sien prison.  
 Puis a parlé en tel maniere :  
 "Esgarde, bele amie chiere,  
 1300 Conois le pere qui t'a faite,  
 Conois por coi tu es destroite  
 Devant les rois, devant les contes,  
 Por qui tu seufres les granz hontes,  
 Les grans douleurs et les grans peines,  
 1305 Por qui de bien fere te peines ;  
 Parfés ce que tu as empris,  
 Si te metré em paradis.  
 Tes amis sui, et tu m'amie,  
 Saches, je ne te leiré mie,  
 1310 Que moult me plect ta grant bonté."  
 A tent s'en est el ciel monté.  
 [205, 1] L'Emperere[s] après repaire,  
 Quant il ot parfet son afere ;  
 En Alixandre est retornez  
 1315 O il ot les plez ajornez  
 De son afere et de sa terre.  
 Puis commenda qu'en li aut querre  
 La damoisele isnellement,  
 Por ce qu'a fere l'ot covent ;  
 1320 Et quant el fu devant le roi  
 Qui avoit [dit] par son desroi,  
 Qu'el ne menjast de quinze jors,  
 Por ce que lons ert li seors  
 Et la grant soufrance de pain  
 1325 La contrainsist, et la grant fain,  
 Il la regarde en mi le vis ;  
 Plus estoit bele, a son avis,  
 Qu'il ne l'avoit devant veüe.  
 Lors cuida qu'elle fust peüe  
 1330 En repost, si l'en pesa moult  
 Qu'il parust moult bien a son volt.  
 Tantost a commandé a prendre



- Toz les chartriers et fere pendre,  
 S'il ne dient par quel congié  
 1335 La damoiselle avoit mangié,  
 Et qui repeüe l'avoit.  
 La damoiselle qui ce voit  
 Ne volt pas que por lui reçoivent  
 Cil mal qui recevoir nel doivent.  
 1340 Mielz velt que l'en sache le voir,  
 Qu'elle les veïst mal avoir.  
 "Roi," fet la virge, "entent a moi,  
 Ne soies pas en tel desroi,  
 Que ci sergent m'aient peüe,  
 1345 Ne que j'aie viande eüe  
 D'ome qui en ce siecle soit.  
 [205, 2] Diex li miens peres me pessoit,  
 Qu'il ne velt pas cels oblier  
 Qui se veulent en lui fier,  
 1350 Par son bon gre me confortoit  
 Qui la viande m'aportoît  
 Tant con ge fui en la prison."  
 Li tiranz, qui sa traison  
 Velt celer dedenz son corage,  
 1355 Qu'elle nel tiegne a outrage  
 (Mes ne li valt riens que il face,  
 Ne blandissement ne menace),  
 "Certes," fet il, "bien peus savoir,  
 Je te vossisse mielz avoir  
 1360 Que ocirre hui par torment;  
 Mes or me di premierement,  
 Puis que si l'avons ore emprîs,  
 Quel consoill as tu de toi pris  
 Puisque tu fus mise em prison?  
 1365 Or si respon, sanz mesprison  
 Au mains, si peulz le meilleur prendre;  
 Ou faces tost, sanz plus atendre,  
 Sacrefices a noz ymages

- Qui sont poissanz, saintes et sages,  
 1370 Ou cuit fere ta char, la tendre,  
 Par grant torment rompre et estendre.”  
 “Rois,” fet elle, “je voill bien vivre,  
 Mes se je part de ci delivre,  
 Ce n'est pas vie, ainz est mort ;  
 1375 Mes se mes cors est por Dieu mort  
 Et derompu par ton torment,  
 Je sai et croi veraïement  
 Que m'ame, se mon cors devie,  
 Ira en pardurable vie.”  
 1380 Li rois, aussi comme gagnons  
 Qui rechigne ses compangnons,  
 [206, 1] Reoulle, et si estraint les danz,  
 Si est iriez el cuer dedenz  
 Qu'il ne set que il doie dire.  
 1385 A ses sergenz dit, par grant ire,  
 “Delivrez moi de ce maufé ;  
 Si durement m'a eschaufé  
 Que ennuit ne seré a aise.  
 Si fetes chose qui me plaise,  
 1390 A honte la feroiz morir,  
 Que riens ne l'en puisse garir.”  
 Que que l'Emperere devise  
 Par quel torment et en quel guise  
 La damoiselle seroit morte,  
 1395 Cursates s'en entre en sa porte  
 Qui ert prevost de la cité.  
 Cruïex et plains de cruauté,  
 Il voit le roi si hors du sens  
 Qu'il met s'entente et tot son sens  
 1400 A torment trover et eslire.  
 “Or ne doutez,” fet il, “biau sire,  
 Por ces parolles decevables.  
 Empereres,” fet li deables,

- " Dont n'as tu honte et desdaing  
 1405 D'une fame que je ne daing  
 Neïs veoir en mi le vis,  
 Qui or te tient, ce m'est avis,  
 Et deloie si longuement?  
 Escoute, et je dirai comment  
 1410 L'en la peut fere tormenter.  
 Ne t'esteut plus a dementer,  
 Car encore ne voi ge mie  
 Torment que ceste anemie  
 [206, 2] Se puisse en tel guise doloir,  
 1415 Que face tretot ton voloir.  
 " Rois, commandes tot sanz sejour,  
 Soient fetes jusqu'au tierz jor  
 Quatre roes par ma devise.  
 Oez comment, et en quel guise.  
 1420 Les deux seront jointes ensemble,  
 Et les autres deux, ce me semble,  
 Seront aussi ensemble jointes  
 De clos menuement porpointes.  
 Et si vos il vosdrai pramaitre,  
 1425 Par les rains je i ferai meitre  
 Broches de fer, par tel esgart,  
 Passeront par chascune part  
 Des roes plain pié et demi.  
 Li cercles qui seront parmi,  
 1430 Et les gentes que li rois tiennent  
 Qui au torner vont et reviennent,  
 Seront broches de tout entor.  
 D'une façon et d'un ator  
 Seront les roes toute[s] quatre.  
 1435 Après si les feré enbatre  
 En un grant fossé ou seront.  
 Que que les roes torneront  
 Contreval, tout a une hie

- Que les autres tormenz la fuie  
 1440 Contremont et en tel maniere,  
 Tout l'une avent et l'autre arriere,  
 Entre les broches de mileu  
 Aura la pucelle son leu.  
 La sera mise toute nue,  
 1445 Et quant l'eure sera venue  
 [207, 1] Que les roes de[v]ront torner  
 Et par engin fere atorner,  
 Et l'une contre l'autre ira,  
 Onques si tost ne descira  
 1450 Li leus sa proie de sa poe,  
 Com les denz de chascune roe  
 Li derompront sa char, la tendre.  
 A ce porront essample prandre  
 Li Cretien qui i(s) seront.  
 1455 Por ce tui[t] se repentiront ;  
 Mes il est droit que l'en l'essoit,  
 Et que devient le torment soit  
 La damoiselle vue assise.  
 Après a son voloir eslise  
 1460 Ou son damage ou son profit,  
 Que el muire, ou Dieu sacrefit."  
 A tant mandent les charpentiers.  
 Tant i ot mis de jors entiers  
 Que li tormenz est aprestez.  
 1465 Enmi la sale est arestez,  
 Plains de broches de fer agües.  
 Li pueples et les genz menues  
 Se sont assemblez tot entor,  
 Et n'i a nul qui de l'estor  
 1470 Et de la noise que il maine  
 De la peor et de la paine  
 Ne tranble tot en son corage.  
 Li rois s'estut en son estage  
 Et commande que tote nue

- 1475 Soit la pucele detenue.  
 La damoiselle est despoilliee,  
 Toute preste et apareilliee  
 [207, 2] De mort souffrir moult volentiers  
 Por Jhesucrist, s'il est mestiers ;
- 1480 Que nul torment que elle voie  
 Ne nul travaill ne la desvoie,  
 Ne point n'en est ses cuers grevez.  
 Vers le ciel a ses eulz levez  
 Et dit soëf, entre ses denz,
- 1485 Et prie Dieu du ciel(ir) dedenz :  
 "Diex en qui est toute poissance,  
 La cui pitié garde et avence  
 Celui qui de bon cuer l'apele,  
 Entent le cri de la pucele
- 1490 Qui a son besoing te reclaime,  
 Qui de son cuer te doute et aime ;  
 Et fai que cist engignement  
 Qui de mort est aprestement,  
 Qui por moi est ci embuchiez,
- 1495 Par ta foudre soit trebuchiez  
 Et froissiez par pieces menues,  
 Que ces genz qui sont [ci] venues  
 Et qui en ton non ne se fient  
 De leur pooir te glorefient.
- 1500 Sire, tu sez certainement  
 Que por la peor du torment  
 Ne faz je pas ceste requeste,  
 Que de morir sui tote preste  
 Et de souffrir si grant martire
- 1505 Com tu me degneras eslire.  
 Mes jel di por cels qui ci sont  
 Qui en ton non por moi creront,  
 Qu'en toi aient gregneur fiance  
 Quant il verront ceste vengeance.

- [208, 1] 1510 A paine ot fete sa priere  
 Qant Jhesu qui l'avoit tant ch[i]ere  
 Li envia son vengeance :  
 Du ciel descent isnellement  
 Un ange a tot une foudre  
 1515 Plaine de vent et o grant poudre,  
 Qui fiert l'enging en tel maniere  
 Que piece n'i remest entiere,  
 Et les pieces (q)an sont saillies,  
 Si ont les genz si esbahies,  
 1520 Si con les venz les a ruees ;  
 Quatre mile en a ruees,  
 Si feri si l'estorbillons  
 Que du fust ne des aguillons  
 Ne remest broche ne astelle,  
 1525 Que por l'amor de la pucele  
 Ne se vengast de ceus de lez,  
 Si qu'il i ot d'escervelez  
 Quatre mile paiens par conte ;  
 Issi li vengat Diex sa honte.  
 1530 A ce miracle iert la reïne  
 Qui atendoit de Kateline  
 La passion couvèrement.  
 Elle a veü le vengeance  
 Que Dex a fet tot en apert,  
 1535 Lors se porpensse que elle pert  
 Son tens s'el se cele forment.  
 Lors se lieve isnelement  
 Devent le roi qui s'en enrage,  
 Ne ne tient pas. Fet elle a sage :  
 1540 " Ha ! chetis rois, que pensses tu ?  
 Tu voiz com Diex a grant vertu,  
 [208, 2] Tu le cuides vaincre par force ;  
 Cesses tu, dolent, ne t'esforce  
 De hater ton grant dempnement  
 1545 Que tu aras hastivement.

- Sachiez que ci te peut dempner  
 Ce Diex, qui ci pot amener  
 La foudre, dont quatre mile home  
 Sont ci ocis a une some.”
- 1550 A ce que la reïgne a dit  
 Se leverent, sanz contredit,  
 Maint Sarrazin qui tot ce virent.  
 Maintenant si se convertirent  
 Devant le roi apertement
- 1555 Et crierent moult hautement :  
 “ Li Diex au[s] Cretiens est granz ;  
 Nos nos tenons a ses sergenz  
 Et tendron desi qu’en la fin,  
 Que si verai Dieu ne si fin
- 1560 N’avons nos encore trové.  
 Rois, nos avons bien esprové  
 Que tes Diex sont veines ydoles  
 Que tu forges au[s] mains, et doles.  
 Ne peuent nul aïde fere.
- 1565 Rois, cil Dieu sont de put afere.”  
 Quant li tirant a ce oï  
 Sachiez, point ne s’en esjoï,  
 Ainz a eü moult grant haïne,  
 Et plus assez a la reïgne ;
- 1570 Lors l’apele par itiex diz :  
 “ Qu’est ce, reïgne, que tu diz ?  
 Por coi t’es tu de ce ventee ?  
 Li Crestien t’ont enchantee,  
 Mes je te jur par mes granz Diex
- [209, 1] 1575 Que se tu es longuement tiex,  
 Et tu ne lesses ta foleur,  
 Je te ferai a grant douleur  
 La teste du cors desevrer ;  
 Et si ferai ton cors livrer
- 1580 Et au[s] bestes et aus oisiax  
 Qui en feront toz leur aviaux.”

- Lors commende que l'en la praigne  
 Et que l'en li perce et destraigne  
 Les mamelles de son costé
- 1585 A clos de fer, a grant viuté,  
 Et quant seront bien atachiees  
 Hors du cors li seront sachiees.  
 Tentost l'ont li sergent ravie  
 Qui li vellent tolir la vie.
- 1590 En dementres qu'i[l] la menoient  
 Et si laidement demenoient,  
 Elle regarde la pucele,  
 Et dit, "Amie, car apele  
 Notre Segneur par ta priere,
- 1595 Por qui amor j'ai si po chiere  
 Ma vie que je voill morir.  
 Priez cil qui tot peut merir  
 Les granz travals as ses amis,  
 Du bon cuer qu'il a en vos mis
- 1600 Me gart et tiegne fermement,  
 Que por la poor du torment  
 Ma foible char ne se repente,  
 Que ne perde ma bone entente  
 Et le reaume et la corone
- 1605 Que Diex a ses chevaliers donne."  
 A tant li respont Katheline :  
 . . . . .
- [209, 2] "Moult joieusement te demaine.  
 Por ceste transsistoire painne
- 1610 Avras hui vie pardurable ;  
 Tu n'as mesgarde du deable."  
 La reïgne, por ce confort,  
 A le corage ferm et fort  
 Et prest de souffrir le martire.
- 1615 Lors commence au sergent a dire  
 Que il parface isnelement  
 L'emperial commandement.



- Li sergenz plains d'iniquité  
 La mainne hors de la cité,  
 1620 Si li derompe(nt) les mamelles.  
 A bien tranchantes les lemailles  
 Li embatent enmi le piz,  
 De ce soiez vos tretoz fi(1)z ;  
 A tenailles li sachent hors  
 1625 Les tendres mamelles du cors,  
 Puis li ont parmi le costé  
 Un moult tres grant coutel bouté  
 Si que l'ame s'en est partie ;  
 U ciel a la destre partie  
 1630 Mist la reïgne nostre Sire.  
 Par nuit i est venuz Porfire  
 Ou li cors avoit esté mis,  
 Entre lui et de ses amis,  
 Si l'a doucement enbasmee  
 1635 Qui moult l'avoit toz jors amee.  
 Puis l'enseveli gentement  
 Et li fist son enterrement.  
 A l'andemain ont demandé  
 [210, 1] Cil qui li rois a commandé,  
 1640 Qui avoit ainssi atorné  
 Et enbasmé et enterré  
 Le cors ainssinc a la reïgne ;  
 Et si en ont maint por haïne  
 Li menistre par leur desroi  
 1645 Pris et mené devient le roi,  
 Et les commande toz ocirre.  
 Mes Porfire, qui ne desirre  
 Fors por Dieu martyre souffrir,  
 Se va donner et poroffrir  
 1650 Tot de son gre au fereor,  
 Et va devient l'empereor.  
 "Empereres," ce dist li quens,  
 "Tel jugement n'est mie buens,

- Que fez ocirre sanz meffet  
 1655 Cels qui ne t'ont de neant mefet.  
 Tu t'en porras bien repentir,  
 Mes je ne voill pas consentir  
 Que nus en muire sanz deserte ;  
 Ci aroit trop desleal perte.  
 1660 Mes se cil a mort deservie  
 Qui la reïgne a ten servie  
 Que la reïgne enseveli,  
 Por ce que Diex iert bien de li,  
 Je ne dout riens itel meffet.  
 1665 Bien saches tu que je l'é fet ;  
 Je croi en Dieu, nel quier celer,  
 Que tout le mont doit apeler.”  
 Li tiranz, comme forsenez  
 Qui laidement s'est demenez,  
 1670 Car il a el cors le deable,  
 [210, 2] Giete un cri si espeontable  
 Que tretoute en tentist la sale,  
 Et dist, “ Chetis, l'eure fu male  
 Que je onques cheï sus terre.  
 1675 Male mort, car vien, si m'atterre,  
 Quant je pert tout a la reonde  
 Ce que j'amoie en tot le monde.”  
 Tantost commande qu'en li face  
 Venir tretouz enmi la place  
 1680 Les chevaliers de qui Porfire  
 Estoit esconestable et Sire.  
 Tuit sont divent le roi venu,  
 Mes il li est si avenu  
 Que tuit ensemble li ont dit  
 1685 Qu'il creoient en Jhesucrist ;  
 Mes por travail ne por menace  
 Ne por poine que l'en leur face  
 La creance ne guerpiront,

- A leur Segneur obeïront.
- 1690 A po que li tiranz n'enrage,  
Si commande par son outrage  
Que l'en les face tormenter.  
A ce les cuide espeonter  
Que por la peor du torment
- 1695 Guerpissent leur proposement.  
A tant Porfire s'est dreciez  
Et saut avant tot correciez,  
Que sanz lui les en vit aler.  
Lors les commance a apeler :
- 1700 "Qu'est ce ?" fet il, "droiz empereres,  
Que moi qui sui sires et peres  
Icés chevaliers lesse vivre,  
[211, 1] Et les lesse a leur delivre.  
Saches que tu n'aras rien fet,
- 1705 Que je sui chief de ce meffet."  
"Se tu es," fet li rois, "li sires,  
Ne soies pas por ce li pires,  
Mes de tent comme a toi apent  
Les la folor, si te repant.
- 1710 De tant leur doinge bone essample ;  
Fai maintenant, et si t'essemble,  
Et se tu vels avant venir  
Je te ferai avant ferir."  
Tantost commande qu'en le praigne
- 1715 Et avoc les chevaliers maigne  
Loing au dehors de la cité.  
Iluec sont li cors [fors] geté  
Et les testes a une part,  
Que li lyon (a un) et li liepart
- 1720 Et les chiens et les autres bestes  
Les cors mangassent et les testes.  
A l'endemain se fu assis  
Tot correciez et toz penssis

- Li rois, en la sale marbrine,  
 1725 Et commande que Katherine  
 Li soit devant lui presentee,  
 Si l'a par itelx diz tentee :  
 "Pucele, entent ce que je di,  
 Se tu vels, si le contredi.  
 1730 Tu es coupable de la mort,  
 Car touz cels qui sont ici mort  
 Tu les avoies enchantez,  
 Par toi les ai ge tormentez.  
 Mes se repentir te voloies  
 [211, 2] 1735 De la creance ou tu foloies  
 Et tu voloies ahorer  
 Mes Diex puissanz, sanz demorer,  
 Je te feroie ja reïgne ;  
 Toz le corroz et la haïne  
 1740 Que j'ai vers toi, te pardonroie  
 Et mon reaume te donroie.  
 Or fai moult tost, ne me delaie,  
 L'un de ces deux pren, si me croie :  
 Ou tu les sacrefices faces,  
 1745 Ou ton chief, sanz autres menaces,  
 Te ferai ja du cors sevrer,  
 Si le feré au[s] chiens livrer,  
 La hors en cele large voie,  
 Si que tretoz le mont le voie."  
 1750 "Emperere," dit la pucele,  
 "Iceste mort m'est bone et bele :  
 Ce n'est pas mort, einçois est vie,  
 D'autre chose je n'ai envie  
 Fors de morir por mon seigneur.  
 1755 Je n'oi onques joie gregneur,  
 Car por ce pleur avroi leesce,  
 Repos avrai por ma tristesse,  
 Vie sanz fin, joie sanz ire,  
 Je ne te puis la disme dire

- 1760 Comment je me doi esjoïr ;  
 Toute sui preste d'obeïr  
 A ce que tu commenderas ;  
 Ja tel torment ne troveras  
 Que je ne seufre de grant joie,
- [212, 1] 1765 Que moult m'est tart que mon roi voie  
 Et l'agnel que les virges sivent  
 Par qui li agnel du ciel vivent ;  
 Ite segneur doit l'en requerre  
 Qui fist et ciel et mer et terre."
- 1770 Quant ot parlé la damoiselle  
 Li tiranz ses homes apelle,  
 Dont il avoit devant li maint,  
 Et commande c'on li amaint  
 Hors de la cité d'Alixandre ;
- 1775 La facent le sien sanc espandre,  
 Ileuc li soit li chief copez,  
 Si en sera ses cuers vengiez.  
 Tantost la mesnent li sergent,  
 Moult en ont grant pitié la gent
- 1780 Et crient après la meschine :  
 "Ha ! douce amie, Katheline,  
 Aiez pitié de ta jovente,  
 De ta biauté qu'issi est gente  
 Plus que rose ne fleur de lis.
- 1785 Belle, esgarde que tu eslis ;  
 Tu lesses joie por tristesse,  
 Tu prenz povreté por richeice,  
 Tu vels por mort changier ta vie ;  
 Ainz mes pucele n'ot envie
- 1790 De morir, fors toi seulement.  
 Or te vels livrer a torment ;  
 Jentil pucele, si delivre  
 Ton cors, qui est dignes de vivre."  
 "Haï ! Segneurs," dist la pucelle,
- 1795 "Lessiez ester ceste querelle,

- Ceste plainte, que riens ne valt,  
 Ja nus de vos ne se travalt ;  
 Se la douceur de la nature  
 [212, 2] Qui seurvaint toute creature  
 1800 Eslit mon cuer por sa daintié,  
 Bien en devez avoir pitié.  
 De ce ne vos merveilliez pas,  
 Que cist siecles n'est c'uns trepas ;  
 Ainçois aiez tretuit grant joie  
 1805 Qu'apareilliee m'est la voie  
 Jhesucrist en son paradis.  
 Jel voi el ciel, ce m'est avis,  
 Ou il m'apelle et semont  
 Que je m'en voise la amont.  
 1810 C'est mes espous, c'est mes amis,  
 C'est cil en qui j'ai mon cuer mis,  
 C'est mes espous, c'est ma corone,  
 Je n'en ai riens, s'il nel me donne,  
 Que je sui du tout en sa garde.  
 1815 De vos pensez et prenez garde,  
 Que mort qui tot le mont desdaigne  
 En cest erreur ne vos seurpraigne,  
 Que por le servise du deable  
 Ne perdoiz vie pardurable."  
 1820 Issi est venue en la place  
 Li menistre qui les menace  
 De la teste fere voler.  
 El demande congié d'orer  
 Et il li done volentiers.  
 1825 Son cuer qui est vers Dieu entiers,  
 Et ses oelz vers le ciel adreice  
 Et prie Dieu par grant destraiçe :  
 "Biau Sire Diex, biau sire peres,  
 Mes amis et mes enpereres,  
 1830 Amis por tes amis en terre,  
 [213, 1] Rois, por les tuens en voi ge fere  
 Enneur de ceus qui en toi croient,

- Gloire des Virges qui te croient,  
 Li bons Jhesus graces te rent  
 1835 De ce que jehui je me sent  
 Abiter entre les anceles  
 En (la) compangnie des puceles  
 Qui en ceste fraginité  
 Gardoient leur virginité.  
 1840 Sire, par ta miséricorde  
 A ce que je requier t'acorde,  
 Que cil qui aront en memoire  
 Ma passion et ma victoire,  
 Et en l'oneur de toi, biau Sire,  
 1845 Otroie le sanz contredire,  
 Que tu entendes leur requeste  
 Et que t'aïde leur soit preste  
 En quelconque(s) necessité,  
 Ou de mal ou d'aversité.  
 1850 Se besoing ont de toi proier  
 Ce dont leur vuoilles otroier,  
 A l'eure qu'il m'apeleront  
 Et par besoing me requerront,  
 De leur complainte aiez pitié,  
 1855 Por m'amor et por m'amitié.  
 Sire, j'ai ta volenté faite ;  
 Se de noient me sui meffaite,  
 Par ta pitié me fai pardon ;  
 Por toi me(s)t mon cors a bandon  
 1860 Au glaive que je voi ci preste.  
 Sire, mon cors te doing et preste  
 Por toi avoir en ce martyre.  
 [213, 2] M'ame reçoif, Jhesu, biau sire,  
 Plus ne dement, de voir le saches ;  
 1865 Et par les mains a ces mesages  
 La me(s)t en repos pardurable,  
 Que ne chiee es mains au deable."

- A tant li est seur lui venue  
 Une columbe tote nue  
 1870 Qui de parler ne se tint mue :  
 “ Vien, bele seur, vien, douce amie,  
 Vien u ciel quierre ta deserte ;  
 Veez la porte qui est overte,  
 La porte de beneürté ;  
 1875 Alez en bone seürté,  
 Que tes leus est en paradis,  
 Apareilliez par grant devis.  
 La atendent presentement  
 Les anges ton commandement,  
 1880 Qui contre toi vellent venir  
 Et tu leur peuz veoir tenir  
 Une corone de fin' or  
 Que je ai prise en mon tresor,  
 Dont tu seras ja coronee.  
 1885 Vien t'en, que bone fus tu nee ;  
 N'aies peor, amie chiere,  
 J'ai bien oïe ta priere ;  
 Que tretuit cil qui ton torment  
 De bon corage et humblement  
 1890 Reclameront, ma douce amie,  
 Leur priere sera oïe.”  
 El ciel s'en est la voiz alee  
 Et la pucele a avalee  
 La teste aval, en la poudriere,  
 [214, 1] 1895 Si a parlé en tel maniere :  
 “ Amis, or fier, il est bien eure,  
 Il me targe trop et demeure  
 L'emperial commandement ;  
 Delivre toi isnellement.  
 1900 Dieu m'apelle, bien l'as oï.”  
 Li sergent li ot benoï,  
 Fiert de l'espee et le chief vole  
 A terre sanz plus de parolle.  
 La avindrent de ce martire



- 1905 Deux choses qui bien font a dire :  
 L'une fu que en leu de sanc  
 Virent cheoir let tretot blanc  
 Parmi la plaie a grant foison ;  
 Et or bien savez, c'est raison,
- 1910 Car li laiz fu, par verité,  
 Tesmoing de sa virginité.  
 L'autre des choses qui avindrent  
 Fu que li ange a son cors vindrent  
 Nel mitrent pas en non chaloir,
- 1915 Ençois l'emporterent por voir  
 El mont Sinaj, sanz delai,  
 Ou dame Diex dona la loy  
 A Moyses le bon profeite.  
 Du leu ou elle fu deffaite
- 1920 Jusqu' au mont de sa sepulture  
 A moult jornees d'erreüre.  
 Des enfers qui i sont venu  
 La sont maint miracle avenu,  
 Mes une merveille i avint
- 1925 Q'a maintes gent veoir covint,  
 Que de son sepucere decourt  
 Huile qui les enfers secourt ;  
 Neïs des oiseleiz menuz  
 I est maint miracle avenuz ;
- [214, 2]
- 1930 Partot les leus ou l'en le porte  
 En decort huile qui conforte  
 Toz les enfers qui en sont oint,  
 Que les maus puis ne grevent point.  
 Ceste pucelle, bien m'en membre,
- 1935 Soufri mort el mois de novembre,  
 Le jor sai ge bien et connois,  
 El vint e cinquiesme du mois,  
 Soufri mort a un vendredi  
 A tierce, un po devant midi.

- 1940   Gui en romanz si se desc[u]evre  
       Qui a a chief menee s'œuvre  
       Et rent graces a Jhesucrist  
       De sa peine et de son escrit  
       Qu'il i a si bien achevé;  
 1945   Et si ne li a riens grevé.  
       Il ne l'a pas fet por le monde  
       Ja tex vices ne le confonde  
       Qu'il face riens por vaine gloire!  
       Ençois l'a fet en la memoire  
 1950   De la glorieuse pucele  
       Por qui amor il renouvelle  
       La passion qu'el a souferte  
       A son gaang, a sa deserte;  
       Et por s'amor a maintenue  
 1955   Qu'el ne doit pas estre teüe.  
       Or li prieré en la fin  
       Qu'elle me face un don sanz fin:  
       Quant l'ame s'en voldra partir  
       Que malfez nel puissent partir  
 1960   Et que ne l'ait deable en garde.  
 [215, 1]   En sa deffansse et en sa garde  
       A del tot s'ame et son cors mis  
       A la virge, ce m'est avis;  
       Et cels qui orront le torment  
 1965   Facent don et otroiement  
       Du sen qu'il i voldront requerre.  
       Cil qui fist ciel et mer et terre,  
       Ce q'en peut veoir et tenir,  
       Nos face a bone fin venir,  
 1970   Qui regne pardurablement,  
       Sanz fin et sanz commencement.

HENRY ALFRED TODD.